

福建通志

第玖拾冊
孝義傳

K295.7

1

福建孝義傳卷十六

清四

洪孔燧字景宿順治三年兵至泉州伯兄被拘勒百金贖時孔燧扶嫡母避在外聞兄被繫馳歸盡搜婦珥僅二兩許以進兵怒將斬兄孔燧乃給之曰外間有金盞出兄取之某爲質兵乃出兄兄遍告貸僅得七金兵益怒遂繫孔燧髮於馬策而語之曰里中有富家若引去可不死孔燧曰死則死耳富人無有遂被害兵旣去家人馳哭之兩袖稜然有物視之則考妣二木主也聞者傷之族人高其義私謚恭烈

黃明台字晉國盜賊並起族人黃斗世爲賊所脅從明台力陳不可乃止旣而賊推吳觀爲首觀黃之家奴也與其弟吳二吳尾俱以勇著順治四年吳觀聚數千人歃血爲盟先加刃於斗世妾毀其家遂大出劫掠明台立木柵集鄉兵禦之力不能支時大將馬得功來泉州明台伏萬安橋下覆以草俟得功至起抱馬頭曰郡北有難請急救得功疑有詐叱斬之大

呼曰奈何殺義士方今奸宄竊發縱橫數十里若不急除瞬息抵郡城矣
得功未之信明台願以一家坐誣乃縛與俱是時觀黨數萬分爲三寨吳
尾據香爐寨吳二據玉葉觀白據半嶺庵得功卒僅三百不敢前明台曰
香爐地窄乏水宜先攻從之獲吳尾乘勝攻觀道險敵衆將士難之明台
曰烏合不知紀律聞官軍至皆倉皇宜張聲勢奪之乃多增旗幟樹山中
使卒周旋而行日夜相繼觀懼宵遁明台誘觀婢偵知其處殺之於筭坑
石室中玉葉遂解散明台就金溪隱焉

陳曙字樹初十三歲父母患疫禱天願以身代母眼昏以舌舐得復明順
治閒與查將軍相善及鄭氏平查將軍爲大帥駐兵東門外遣騎持令箭
護其家有婦女百餘爲兵縛累見箭乃駭散得免俘辱騎詢曙已故二子
避入永春其長孫及一僕方被繫南去尋至演武場得之查將軍遺以佩
劍弓矢使庇家未幾有他駐兵踞其宅索酒食不給適白頭賊夜襲郡敗
走駐兵得賊號衣密擲其家牀下誣與賊通曙長孫持弓矢衣服自明寧

海將軍驗實釋之

潘見龍字正南諸生順治五年海氛寇郡城中戒嚴民出入皆有印記見龍閒道歸度圍城中必不可活乃負母先出趨閭湖次及寡嫂諸孤最後始挈其妻又入賊壘慟哭旬日脫其從兄歸

莊烈字藻山諸生順治九年十年海寇焚劫烈捐貲募鄉勇殲之南關外七十餘鄉賴以安其歿也紳士爲之立碑於二十七都路左

朱兆綸字亮卿父病篤而倭寇至兆綸侍父不忍離被擄去路經蓮葉池投池中伏水底倭以刃刺之不及倭去因歸奉湯藥父病以瘳同縣周銓字君選順治初父母避難於惠之崇武銓獨守祖櫬不忍離亂稍定省親道遇賊不爲害海潮暴至幾淹沒賴救得免

柯得昌字昭全諸生時寇盜交訐海濱尤甚得昌請於官築沿海七寨民得防禦順治十八年遷界民復徙僑得昌資其饑寒恤其征役全活千餘人孫偉生字則俊乾隆乙丑進士知河南光山縣里中淤田塘溉田三千

八百餘頃建築海岸陡門時其啓閉偉生子式玉廩生亦留心塘務賣田築岸都人傳爲美談同里例貢生柯士元以淤田塘屢圯於水出貲修築之

吳炎字隱甫製神糲治百病以此獲貲而好義樂施朔望給米與饑者冬月買舊衣冠以給寒者施藥施棺無所吝修築菜山三石橋南安霞舒坑尾橋西門外晉南交界東關嶽口至七里庵亭大路又葺紫帽山金粟洞倡建鳳山寺寺外爲亭以憩行旅泉遭海氛後暴骨如莽約同志拾之爲義塚於鳳山麓封焉年九十四卒子雄略康熙甲子武舉人江淮衛千總陳明陞字候階康熙乙巳歲貢生少孤事母怡邑柔聲母疾號天請代時奉文遷海疆居民入郡雖世家公族不免明陞竭力周族費至萬金得免遷於是附近前洲龍塘龍窟諸鄉數萬家皆藉得安居及播遷之後繼以洪水民饑弱待以舉火者千百家買曠地爲義塚聽貧者葬焉

楊瑞貞字兆昌祖籍晉江徙同安少喪父與從弟懷周共依母田氏順治

初海氛不靖田負懷周挈瑞貞出走賊驟至子母相失瑞貞爲官軍攜至京養爲嗣子長婚娶生三子瑞貞每思母南向涕泣追嗣父卒妻王氏憫之使歸尋母持二百金行中途爲同行所詐子身歸故里母尙存不之識也母自失瑞貞後與懷周相依懷周航海爲商致貲巨萬每歲贍母母有餘貲疑瑞貞爲僞麾之使去瑞貞倚門號泣感動路人母曰若果吾子宜逐什一利以供薪米瑞貞著芒鞋負販二十里外日以餘利奉母母稔其情乃爲婚於南安張氏亦能孝於姑瑞貞事母十餘年以終

施世黻字文猷康熙乙酉武舉人一貴之亂散家財募死士從藍廷珍攻鹿耳門擒蘇張周和以功授都司僉書銜

謝廷祿

縣志作錄

字曾文少孤鞠於伯父元瑞稍長從伯父賈於吳康熙十三

年耿藩之變吳閩隔絕方嚴賊謀誣元瑞與賊通禍且不測廷祿進曰伯父年老不任刑若誣服百口盡矣盍逸去兒身死之猶止於一也元瑞遁於友家廷祿赴獄拷掠百端會耿精忠已降總督李某曰渠魁已赦此猶

足訊乎燒獄詞破械出之百口得無恙

陳元鳳字鳴長事兄愛敬備至兄嘗以非辜被逮元鳳挺身代兄繫於官同時郭凱亦代兄受繫二人至府各縷述其兄冤狀繼以泣知府劉侃亦下淚破械釋之元鳳博涉羣書至粵西作陽朔紀勝人傳誦之年八十六卒同里陳店父殺人店與兄爭代父死店曰兄且休明日再議之卽於是晚進縣伏罪決於市

王生康熙十三年海寇亂失寡母唐氏生遂棄家賣卜誓不得母不歸後十年宿潮州旅舍夢神人指母處明日得母於陳氏家白王人負之而還居數年生舟行覆溺得一板附之以活

吳之璋字千祿時草寇未淨屢出奇略摧鋒陷陣以賊首降授長樂守備旋以都司屯田山西大同諸寇漸平請歸適入閩而耿藩叛微行由永春至南安諸山時山寇李梓黃玠等竊發之璋練曾垣大庭楓樹盧厝上下埔等村鄉兵禦之寇無所掠而去歸隱詩山格外溪邊

郭璘圭字爾錫嘗從李日烜收捕水沙連賊陳辛敘功加都司僉書職銜及歸內地郡守稔其才令權本府倉官出納精詳軍需以濟有浙人高姓寓泉州將遊幕鄰省家有老母患末疾無人侍奉以託璘圭卽迎至家令妻鄭氏供奉扶掖之間數年不懈撫弟璘璧極友愛會運穀數千石已入港尚未交倉忽遇颶風漂沒傾家償之不及十分之一璘璧請代繫於官璘圭赴省訴於總督姚啓聖飭縣覈實豁免人謂忠厚孝友獲天佑云許學衡字徵若順治十七年副貢生性篤孝康熙十三年就食惠安值寇犯城母病倉卒不及奉避家人盡匿學衡獨伏牀呼天賊入怪其狀引兵刺之透衣弗傷問其故投刃曰孝子也殺之不祥遂引去後選泰寧教諭未行卒

陳茂煥與王宏基結爲兄弟生則合爨同居死則聯墳墓累傳至曾孫陳允明王時楷確守先規囊橐無私吉凶同患繼繩不替時楷孫鳴鳳乾隆丁卯舉人知縣胡恪以異姓天顯額旌之

謝其春寧海將軍喇某命假海兵裝巡界適寇掠婦女八十餘口於舟中
以計盡脫之身幾遇害有故人庇之得免還報大將軍給守備劄同縣鄭
台源割股療父病得遺金訪主還之值寇亂以貲贖難民二十五人
許鶴振先世宋侍御璋由莆田來居晉江家藏有豹山孝經析義訓詞諸
書鶴振幼孤行傭養母身無完衣而母極滋味當海氛播遷族居奔竄獨
奉侍御及累世本主豹山遺書以遁祀不斬而書存同縣尤垂珍以孝友
稱欲續清源文獻未成而卒

莊延裕字素思

題名碑入閩縣

康熙己未進士授翰林院庶吉士纂修十六國史

以病假歸潛其祖所築青陽鄉盈塘恢擴水利鄉人德之又倡修蔡文莊
祠以上道光舊志

吳鴻錫字允康羈旅早孤育於父友郎中噶尼布所及噶老子幼族人環
謀害之鴻錫挺身持正卒定其家撫噶三子成立季立侯爲作吳義士傳
雪橋詩話

龔時璜字渭臣客遊吳門心動亟馳歸值父病亟得親含斂及遭兵燹嗣母及伯兄咸散失閨闈粵中各求得之異母弟漂流蘇州召至粵爲娶室生子族叔某以尙藩事株連謫塞外時璜攜資走萬里爲營救卒護以歸黃朝宗字國棟事父母孝甘旨必親供周恤從兄每月給以蔬米族子姪無依者養育而婚娶之住居中州鄉水衝田廬捐貲築碼頭保數百畝又拾遺金守以還不受謝子呈元康熙癸巳舉人

林松字肇笏父爲桓爲仇家所害松年十七宿露餐風聞道偵之閱八十餘日懸主惡之首剖胸出肺肝獻父靈前復求手刃父者卒遇山閒撞其胸仆之不數日死遂陷囹圄久之海氛熾得脫歸率衆捍衛鄉里奪還惠邑男女被掠者故紳李夢祥子孫哀替櫬暴道傍訪其族人資之營葬子延紳康熙戊子舉人候補知縣

陳大範字子疇康熙壬午舉人榜姓史閩省自康熙三年後會試中式者頗少大範率舉子伏闕陳請自是始分省中額著爲令後選淳安知縣未

任卒

郭應元字景仁永春籍康熙辛丑進士授邵武府教授父病嘗割股以進兄暮年喪子爲置妾兄歿撫姪如子

吳九美字尙仁雍正丙午舉人授南平教諭節孝優行竭力表揚泉州舊制納鹽者免雜差順治閒御史黏本盛疏請折銀輸納然賦歸縣而折輸廳戶籍不分民苦差擾九美偕諸生張雕呈請編入圖甲就產匀丁南鄉民便之勒石紀德焉雕字爾遠與兄登解字爾元治田經商十餘年後登解以雕聰慧使讀書乃獨肩家計謂雕曰吾任養弟任學各努力毋貽父母憂服物器用無歧視教督子姪不分所出子孫遵其教五世同居雕子道南乾隆己卯舉人

李雲永字世瞻傳節婦之子六歲失怙母病數月晝夜不離母歿結廬墓側夙夜哀號知縣題其廬曰慕樓

張延穀字鐘美監生年十九從伯兄持籌於福州福州烈婦楊氏以死殉

貧不能庀事廷穀出金爲營殯葬布政司趙國麟聞之延廷穀至紫薇堂躬自酌酒具金花馬幣鼓樂送之以爲尙義者

蔡必茨字仿廬

一作嚴

祖慶旺由福州教授遷臺灣時年七十必茨隨侍之

官秩滿赴省未出港舟遭風壞祖孫同挾一板板小計難兩全遂以板授祖自投水中隨浪奔騰忽絰旋繩緣之得甦見祖挾板漂流號舟人救之起中年喪偶不再娶二兄繼歿盡以遺產給姪自攜七歲子筆耕嶺北來往以肩挑之左篋右兒所得脩脯分養寡嫂授徒課子不與外事子式金乾隆庚午舉人

秦師彭字周叟以遭兵失父墳有牧夫指示窆所得之母病目含藥以舐目復明又病熱思雪梨求之不得忽遇扶杖老人告以梨處取以薦母病遂瘳弟師觀以事被繫師彭走請身代兄弟爭就法知縣嘉其孝友兩釋之子允升乾隆庚午舉人連江教諭孫景熙母目翳以舌舐之七日而愈奈漢章字元倬父應光被囚漢章代之人稱其孝成乾隆乙丑進士知山

西榆社縣獄空賦平民稱余父舉卓異以內艱歸遂不復出

林元樞每歲除懷碎金百十握出遊通衢親朋相值者權厚薄而投贈焉或未謀面而來者亦酬其意舉人方紳爲作助歲行紀之同縣陳儀長糶米爲業每除夕窮人不給者周之米族中賣子者與以錢使勿賣告乏者隨力助之遇凶災檢券焚焉王大謨字不承急人之難族有外出者其母以念子故成心疾乃爲族子作寄母書并函十金以慰焉

王光有字君孚乾隆己亥副貢生父宗徽嘗買木棉千餘金交納未畢而被火客不敢責償宗敏曰貨已歸吾何敢相負竟如數償之光有事父能承志仲兄病革屬曰弱息十三齡弟善撫之其後事無鉅細必請於嫂而後行卒撫姪使成立選永安訓導有賴生爲知縣某所屈將褫衿光有知其誣力辨之生獲免永安俗多溺女光有訓戒懇切薄俗以除

以上道光舊志

林賜魁字篤齋少孤不知父墓年十四走亂山中徧尋不得撫膺長慟夜宿莽中若有告者晨起有老父問之曰我蘇曉也若父我所痿導之往得

之母病未疾侍奉不倦所知遇疫十口待斃日往視湯藥病者皆起友以
事繫南安獄典衣得十數金觸熱馳七十餘里出之及卒里人私謚爲孝
義先生子聰乾隆壬辰進士孫紹甫乾隆己亥舉人

李堅撰傳李咸補傳

楊應球父必正知貴縣掛冠歸以父母未葬爲憾貴縣門下士寓書請必
正至其地以籌葬費必正得書卽行性好山水七八月尙未至應球忽夢
白輿旋里度是父凶兆卽挈族姪炎往粵西尋之至老龍以其地爲舟楫
通津日往探望夜歸啼哭淚盡繼以血兩目失明卒臨終屬炎曰殯我蓬
頭跣足手持紙筆吾將訴之天尋父同歸從之藁葬於老龍里人哀之題
其墓曰晉江楊孝子墓後應球兄訪知必正歿於桂林權厝楞嚴寺山中
往尋之荒塚纍纍無從踪跡夜夢應球告曰在七里巖下荆棘中如言尋
之果得一碑鐫晉江楊大尹墓拾其骨藏之復至老龍拾應球骸歸葬
蔡其壯字動一以高祖墓葬久沙壓難尋哭於王位詰朝再往有老翁指
示之封樹焉人謂神貺卒年八十二子觀光乾隆甲寅舉人

謝仕偉字君直客於臺灣時黃教將亂還里事定至臺檢遺業所存惟借券二萬餘悉焚之時沒臺地者艱於歸計仕偉倡立柁船二復置田爲經費至泉州無後者爲立義塚於龜亭崎子淑元乾隆丙午解元癸丑進士林鼎漢字禹成寇掠其鄉母龔氏投井死後鼎漢隨父賈外洋父病死海船忌停屍遇死者輒投之海乃祕不發喪謂父病甚不喜人見朝夕進粥皆密藏之夜與尸卧經十餘日屍腐爛而舟人不知也既抵岸始哭具棺殯殮乾隆年間旌表

蔡宗花自其曾祖秉和祖周總父魯榜至宗花之子邦義孫本泉曾孫友憲七世同居合爨一家四十餘人每一世推一人爲家長受其經理內外無訢諍聲同縣吳錫智王世選世迪皆六世同居王氏四世同堂合食共財無閒

吳洛字懷書貢生修郡學及彰化學宮捐充清源書院及臺灣海東書院南湖書院彰化白沙書院膏火又捐充鄉賢祠祭祀重建青陽吳青嶽祠

又修霞涪溪築石岸造青芒橋又修郡試院津頭埔起至坂頭雙坑布袋潭等處石路又造臺灣鹿港二橋刺洞腳庄橋及上廊庄後橋

陳嘉謀監生以郡試院轅門內外石窠土多雨卽泥濘悉砌石道疏溝渠自海宮亭至百源川監生黏嘉樂字儀甫乾隆二十八年倡修府學宮培土使高又修西關外孔道子憲黎乾隆庚寅舉人

蔡維坤字星六世遠族姪少時海氛未靖家零落奮然曰奈何使吾父困於貧遂棄舉人業學爲賈北行經浦城見民醇樸地肥美心悅之遂徙焉耿精忠之變維坤迎其父母及二弟以居次第謀婚娶不私財賄躬儉約以先之祖伯瑜柩停於粵諸昆弟謀卽粵地葬之維坤灑涕曰我閩人也身在此忍使祖父寄他鄉親至粵載柩歸伯瑜之子五人仲叔早世遺孤俱幼維坤爲之置產謀婚延師誨愛如己子歲靡金數百無難色族之居於泉者歲加存問養孤贍貧無怠卒遺命建祠堂以妥先人祠之東設家塾課子弟建義田規條明備可貽久遠子廷鎮遵行之

二希堂文集

黃良驥字元稱監生修青芒鄉石頭街東山路三處勸本鄉集英堂葺南關外海會堂皆有碑誌同時周悠宗與弟仕榮倡修安海橋又修周忠愍公祠又修塗門外至法石及西門外路監生黃元濬字君哲嘉慶十二年捐銀千兩倡修西橋二十一年重修之捐職州同陳元燦嘉慶十一年獨力建涵湧石橋重修外大橋又買石埕墘地爲義冢沈俊華字日輝值大疫捐貲二千有餘以爲棺槨冢墓焉

蕭國儼字人畏鄰有三世節婦其子不能揚爲之請旌客漳州鄰婦夫出姑死吞不能殮傾囊飲助徒步而還鬻子者備貲贖焉國儼嘗投營書過臺臺鎮軍拔外委旋辭去貧不能自給而好齊人急人稱蕭佛子漢傑嘉慶元年舉孝廉方正

吳天爵字愧尊諸生籍南安歲暮見遺金於路拾以侍之少頃有夫婦號泣而至曰家貧負債不能償鬻女於王家得白金四十兩廈門志作至此失之天爵問其姓名乃廟霞鄉薛全叔也因同往王家索券視之悉符合